

Edjean Semeleer a ricibi homenahe y reconocemento bon mereci



ORANJESTAD (AAN): Di-aluna anochi den un Biblioteca Nacional completamente yen, publico presente por a disfruta di un evento sumamente agradable den cual nos cantante Edjean Semeleer a ricibi un homenahe y reconocemento for di Biblioteca Nacional di Aruba, Departamento di Cultura y gestor cultural Sr. Mirto Lacle, pa su 25 añanan di excelencia den e mundo cultural y di entretenimento.

E tabata un anochi den cual creatividad, talento y positiv-

ismo di nos hendenan a resalta un bes mas.

Hobennan cu a representa nos isla den "Arte di Palabra ABC", Obi Tromp y Samantha Garcia-Guevara, a declama poesianan di un forma masha inspirativo. E hoben musico Igmarr Maduro a toka algun piesa riba piano na honor di Edjean. Publico a disfruta inmensamente di esaki.

Locual cu a impacta tambe ta momento cu Sr. Mirto Lacle a conta un poco di e carera musical impresionante di Edjean cu a cuminsa na Maart

1994 y a menciona algun logro di dje, cu e cantante mes no a pone mucho enfasis pa comparti den publicidad.

Uno di nan ta cu Edjean Semeleer tabata e prome cantante infantil y hubenil den historia di henter e region di Caribe cu a lansa un disco compacto. Esaki a sosode den decada 90.

E otro ta cu desde Augustus 2014 te cu awor, pues den menos cu 5 aña, Edjean a haci e esfuerzo excepcional pa recauda mas di 300 mil Florin cu su conciertonan na beneficio

di masha hopi fundacion riba nos isla. Algo cu no tur hende tabata na altura di dje, pero cu sigur ta sumamente admirabel y di gradici inmensamente.

DIARIO ta felicita Edjean Semeleer inmensamente cu e reconocemento y homenahe aki.

Den Edjean nos tin un berdadero y digno embahador di nos isla cu durante henter su carera a percura pa inspira, empodera, aporta na construi nos nacion, haci mundo un mihor lugar y tambe proteha y promove nos herencia cultural.

Nos ta hopi orguyoso y agradecido pa tur loke el a haci y lo sigui haci y significa pa nos isla y su cultura. Masha pabien Edjean!

E eventonan formidable aki ta worde organiza door di Biblioteca Nacional, Departamento di Cultura y Sr. Mirto Lacle, pa asina yuda eleva humanidad y pa pone enfoka riba nos hendenan y nan capacidnan creativo y artistico. Tambe pa pone enfasis di e importancia di nos herencia cultural.